

# Dileu Bagloriaeth Cymru orfodol i fyfyrwyr sydd am fynd i'r Brifysgol

Y Pwyllgor Deisebau | 26 Ionawr 2020  
Petitions Committee | 26 January 2020

Cyfeirnod: RS20/14886

Rhif y ddeiseb: P-05-1091

Teitl y ddeiseb: Dileu Bagloriaeth Cymru orfodol i fyfyrwyr sydd am fynd i'r Brifysgol

**Geiriad y ddeiseb:** Er bod Bagloriaeth Cymru'n darparu llawer o sgiliau cyflogadwyedd pwysig, ac yn dda i'r rheini sy'n mynd yn syth i broffesiwn ar ôl gorffen yn y coleg, mae'n dal myfyrwyr sy'n dymuno mynd i'r brifysgol yn ôl.

Yn flaenorol, roedd myfyrwyr yn gallu astudio hyd at 4 Safon Uwch, neu hyd yn oed 5 ar gyfer y myfyrwyr gorau, ond mae Bagloriaeth Cymru yn eu cyfyngu i dri, ac mae rhai ysgolion hyd yn oed yn eu cyfyngu i 2, sy'n atal myfyrwyr rhag cael addysg eang..

Byddai cael gwared ar Fagloriaeth Cymru ar gyfer y rhai sydd am fynd i'r brifysgol yn caniatáu i fyfyrwyr o Gymru nid yn unig fynd i'r prifysgolion gorau, ond cael gwell addysg hefyd. Mae Bagloriaeth Cymru yn llawn pynciau y mae myfyrwyr addysgedig eisoes yn gwybod amdanynt, ac mae'n gyfwerth ag Astudiaethau Cyffredinol i lawer o brifysgolion. Byddai cael gwared arni ar gyfer y rhai sy'n dymuno mynd i'r brifysgol yn caniatáu i fyfyrwyr fod yn fwy addysgedig. Bydd hyn yn caniatáu i ni gael gweithlu mwy addysgedig a helpu economi Cymru.

Opsiwn arall yr hoffwn ei gyflwyno i gael ei ystyried yw creu cymhwyster UG, a gwneud Bagloriaeth Cymru yn orfodol ar gyfer lefel UG yn unig, sy'n rhoi mwy o amser i fyfyrwyr ar gyfer eu harholiadau a'u galluogi i barhau i astudio 4



pwnc. Gallai ysgolion ddewis a yw hyn yn cael ei wneud dros gyfnod o ddwy flynedd neu mewn blwyddyn.

Mae pobl yn edrych i lawr ar fyfyrwyr Cymru yn gyson, a byddai cael gwell agwedd tuag at addysg (fel yr hyn a wnaed gyda chynnal y cymwysterau UC) yn caniatáu i ni fod yn gryfach a chael ein parchu'n fwy fel Cymry.

## 1. Cefndir

Cafodd cymhwyster gwreiddiol Bagloriaeth Cymru ei gynnal ar ffurf cynllun peilot yn gyntaf ym mis Medi 2003 ac roedd ar gael i'r holl ysgolion a cholegau yng Nghymru ym mis Medi 2007. Adolygwyd Bagloriaeth Cymru yn dilyn adroddiad Llywodraeth Cymru, sef [Adolygiad o Gymwysterau ar gyfer pobl ifanc 14 i 19 oed yng Nghymru](#) (2012) a chyflwynwyd Bagloriaeth Cymru ar ei newydd wedd ym mis Medi 2015.

Ar hyn o bryd, dyfernir Bagloriaeth Cymru ar dair lefel, Sylfaen (lefel 1) yng nghyfnod allweddol 4; Cenedlaethol (lefel 2) yng nghyfnod allweddol 4; ac Uwch (lefel 3). Mae Bagloriaeth Cymru yn cynnwys:

- Y Dystysgrif Her Sgiliau. Mae hyn yn ganolog i gymhwyster Bagloriaeth Cymru ac mae iddi bedair elfen: y Prosiect Unigol; yr Her Menter a Chyflogadwyedd; yr Her Dinasyddiaeth Fyd-eang; a Her y Gymuned
- TGAU mewn Saesneg neu Gymraeg Iaith, a Mathemateg neu Fathemateg - Rhifedd. Gellir defnyddio elfennau llythrennedd a rhifedd cymhwyster Sgiliau Hanfodol Cymru hefyd;
- Dewis o gymwysterau ategol - TGAU, Safon Uwch neu rai galwedigaethol.

Ar y lefelau Sylfaen a Chenedlaethol, yr un maint yw'r Dystysgrif Her Sgiliau â TGAU, a'r un maint â Safon Uwch ar y lefel Uwch. Mae gan y Dystysgrif Her Sgiliau ar y lefel Uwch bwyntiau tariff UCAS. Er mwyn dyfarnu Bagloriaeth Cymru, rhaid i ddysgwyr gyflawni'r Dystysgrif Her Sgiliau a'r cymwysterau eraill y mae'n eu nodi. Mae'r Dystysgrif Her Sgiliau yn gymhwyster annibynnol y gellir ei gyflawni a'i ddyfarnu heb y cymwysterau eraill sy'n rhan o gymhwyster Bagloriaeth Cymru.

## 2. Camau gweithredu Llywodraeth Cymru

Nid oes gofynion statudol i ddysgwyr sefyll arholiad allanol. Fodd bynnag, mae gan Lywodraeth Cymru bolisi 'mabwysiadu cyffredinol' ar gyfer cymhwyster Bagloriaeth Cymru gan ysgolion a cholegau.

## 3. Camau gweithredu Senedd Cymru

### 3.1. Y Pwyllgor Plant, Pobl Ifanc ac Addysg

Ym mis Medi 2018, cychwynnodd y Pwyllgor Plant, Pobl Ifanc ac Addysg (PIIA) **ymchwiliad i statws cymhwyster Bagloriaeth Cymru. Canfu'r Pwyllgor** fod 'diffyg eglurder ynghylch ystyr a gweithrediad polisi Llywodraeth Cymru o ran mabwysiadu'r cymhwyster yn gyffredinol' ac argymhellodd y dylai Llywodraeth Cymru gyhoeddi, fel mater o flaenoriaeth, ganllawiau mwy manal sy'n ymwneud â mabwysiadu'r cymhwyster yn gyffredinol a ddylai nodi'n glir yr amgylchiadau lle gall dysgwyr gael eu heithrio rhag astudio'r Dystysgrif Her Sgiliau.

Cyhoeddodd Llywodraeth Cymru **ganllawiau** ym mis Hydref 2019. Mae'n nodi'r canlynol:

Rydym yn annog colegau a'r chweched dosbarth i sicrhau bod eu pobl ifanc yn dilyn dau neu dri chymhwyster Safon Uwch (neu gyfwerth) yn unol â gofynion y cwrs addysg uwch y maent yn bwriadu'i ddilyn, yn ogystal â'r Dystysgrif Uwch. Mae prifysgolion, ar y cyfan, yn gefnogol o'r dull hwn.

Mae hefyd yn nodi'r canlynol:

Mae'n bosibl na fydd astudio'r Dystysgrif yn ddewis cywir i bob dysgwr, ac felly mae angen i ni arfer rhywfaint o hyblygrwydd. Dylai ysgolion a cholegau ddarparu cyfleoedd sydd er budd pennaf eu dysgwyr. Rydym yn disgwyl i ysgolion a cholegau ddefnyddio'u barn broffesiynol drwy roi ystyriaeth ddyledus i lesiant pob person ifanc a'i allu i gyflawni ei lawn botensial, wrth benderfynu a ellir eithrio dysgwr rhag dilyn Bagloriaeth Cymru a'r Dystysgrif.

## 3.2. Y Pwyllgor Deisebau

Mae'r Pwyllgor wedi trafod nifer o ddeisebau blaenorol mewn perthynas â chymhwyster Bagloriaeth Cymru:

- Cael gwared ar agwedd orfodol Bagloriaeth Cymru (2019). Caewyd y ddeiseb yn sgil dileu'r ymarfer penodol y cyfeiriwyd ato yn y ddeiseb, gwaith craffu ar gymhwyster Bagloriaeth Cymru a wnaeth y Pwyllgor PPIA, ac ymrwymiad y Gweinidog Addysg i gyhoeddi canllawiau wedi'u diweddarau.
- Dileu'r Cymhwyster Bagloriaeth Cymru (2016). Caewyd y ddeiseb oherwydd diffyg cyswllt â'r deisebydd.
- Gwneud i brifysgolion Cymru ystyried Bagloriaeth Cymru fel Safon Uwch (2020). Caewyd y ddeiseb oherwydd safbwynt y Gweinidog Addysg mai mater i brifysgolion yw sefydlu gofynion mynediad eu cyrsiau ac mae'r gwaith sydd ar droed yn ymateb i argymhellion a wnaeth y Pwyllgor PPIA o'r blaen.

Gwneir pob ymdrech i sicrhau bod y wybodaeth yn y papur briffio hwn yn gywir adeg ei gyhoeddi. Dylai darllenwyr fod yn ymwybodol nad yw'r papurau briffio hyn yn cael eu diweddarau o reidrwydd na'u diwygio fel arall i adlewyrchu newidiadau dilynol.